



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Periodu : Juñu 2010

Edisaun : 15 Juñu 2010

JSMP realiza programa “Diskusaun Grupu” konabá Justisa Juvenil iha Eskola Pre-Sekundáriu

Judicial System Monitoring Programme (JSMP) liu husi unidade Programa Observasaun Parlamentu (POP) iha Sábado 12 Juñu 2010 liu ba, halao diskusaun fokus grupu lora baluk konabá esbosu lei justisa juvenil iha eskola Pre-Sekundária 10 de Dezembru, Dili.

Objetivu husi diskusaun ne'e atu rona estudantes pre-sekundária sira nia hanoin, opiniaun ba preparasaun esbosu lei justisa juvenil ne'ebé agora prepara hela husi Ministériu Justisa.

Luis de Oliveira Sampaio, Direitor JSMP, haktuir katak konsidera importansia husi involvimentu labarik sira nia opiniaun no interese holístiku ba esbosu lei ne'e, enkoraja JSMP liu husi POP atu organiza grupu diskusaun ne'e iha eskola 10 de Dezembru atu fo biban ba labarik sira hodi diskute sira nia espetativa ba lei ne'e no saida mak tenke regula iha lei ida ne'e nia laran. Tanba liu husi mekanismu ne'e, JSMP bele inkorpora sira nia ideia ka rekomendasaun hodi submete ba Ministériu Justisa.

Direitor JSMP rekoñese katak, dalabarak estudante sira envolve ka tama ba iha konflitu ho lei maibé, sira la hatene prosesu justisa ba sira nia aan rasik. JSMP hein katak diskusaun ne'ebé hala'o tiha ona bele fo informasaun ruma ba estudante sira hodi koñese liu tan prosesu justisa ba labarik sira tuir padroins sira protesaun ba direitu labarik nian ne'ebe defini iha Konvensaun kona-ba Direitu Laabrik nian.

JSMP sente hasolok tebés tanbá eskola Pre-Sekundária 10 de Dezembru bele disponivel atu organiza no fo fatin ba JSMP atu realiza diskusaun fokus ba grupu ne'e iha sira nia eskola. Pontu importante liu mak estudante sira ativu hodi fo sira nia opiniaun no hanoin konabá lei ne'e, no hanoin balun konabá esbosu lei Justisa Juvenil.

Tuir mai rekomendasaun balun ne'ebé mak estudante sira foti iha diskusaun mak hanesan:

- Sira aseita ho protesaun espesial ba labarik husi tinan 18-21 tanbá kondisaun Timor Leste la hanesan ho nasaun dezenvolidu sira;

- Presija uma mahon ba labarik sira ne'ebé mak konfliktu ho lei;
- Iha uma mahon laran presija iha edukasaun sívika, moral no treinamentu sira ne'ebé mak sei benefisia labarik sira nia futuru;
- Wainhira labarik sira hela iha uma mahon iha mós tempu ba sira atu hasoru inan-aman no hetan advogadu hodi ajuda sira; no
- Presija mós fatin diferente ba labarik feto no mane iha uma mahon laran.

Maski nune'é estudante sira mós deklara katak, aleinde hetan direítu espesífiku nu'udar labarik, sira mós iha dever atu kumpri regulamentu iha prosesu tomak nu'udar responsabilidade ba hahalok ne'ebé mak sira halo ona.

Aproveita oportunidade husi diskusaun focus ba grupu ne'e, estudante sira mós husu atu ministériu competente bele tau matan mós ba fasilidade eskola nian hanesan; kondisaun fíziku eskola, fasilidade kadeira, meza, komputador, fasilidade ba prátika nian, biblioteca no ambiente ne'ebé diak no seguru, hodi nune'é bele redus estudante sira atu involvimentu iha atividade sira ne'ebé lori sira ba konfliktu ho lei.

Tanbá tuir sira nia hatene katak Konstituisaun RDTL garante liu-liu artigu iha 18 Estadu tenki fo protesaun espesífiku ba labarik. Konvensaun Direítus Labarik nian mós obriga Estadu RDTL atu garante direítu fundamental balu ba labarik hanesan, direítu sobrevivensia, direítu ba dezentvolvimentu, direítu ba protesaun no direítu partisipasaun ba informasaun, no seluk-seluk tan.

Atu hetan informasaun kle'an favor kontaktu:

Luis de Oliveira Sampaio

Diretor JSMP

Diresaun e-mail: luis@jsmp.minihub.org

Landline: 3323883